

敘例

夏口縣志卷二十二

民國九年十有一月夏口縣志既成帙主任兼總纂呂寅東曰夏口之有志豈易集事哉先是清宣統初年寅東與同邑陳君松年等任夏口教育分會議以夏口與漢陽分治十餘年而志乘闕如我輩之責也始創議纂輯因經費無着未果又二年江西新建王君木齋來蒞斯土與之熟商王君主抽收闔邑中用五分之一爲經常費庶所入較優而於民無擾議既定爰通詳各憲立案並呈請提學使撥學款數百金先行創辦悉奉批照准開辦有日矣辛亥八月革軍起武漢鼎沸事遂中輟民國以來寅東與同人奔走籌畫又五年守土者皆存五日京兆之見迄無要領是年冬南皮侯君小汀來知縣事毅然提倡仍援前案以中用捐爲經常費又商之商會諸巨公及本縣紳富各捐資爲印刷費遂於民國六年

志

敘例

陰七月一日就 文廟兩廊設局而寅東忝爲總纂蓋經營組織十年餘乃得著手進行雖同人贊助之力而主持於上豈不重賴賢有司哉雖然總纂之職未易居也況以寅東之鄙陋敢不懍懍乎既開局謹擬體例就正田君煥亭李君惺樵兩審定於京師迎密君丹階主審定於漢皋所以求公是也又延舒君虞笙劉君者壽周君韡庭王君楷存王君文波周君季翰六君子爲分纂未幾李君希儒自河南滎澤改組歸亟迎之爲協纂所以集眾思廣忠益也乃取同治八年續修漢陽縣志相與商榷甄錄其應屬夏口者存之不應屬者去之其未分治前與既分治後五十年間逸文軼事廣加搜羅閱時三週星糜金錢三萬餘貫積日累月合羣策羣力而後成是書也豈一手一足之烈與書既成寅東次第之而爲之敘敘曰

康志武功不載星野首重輿地自是作者孟子治滕必嚴經界分土分民各從其類裴秀六法久已失傳疆域既明開卷瞭然秦漢以來增省分并名實同異最爲糾紛沿革弗講必多舛錯戴氏東原實早詔我山有陰陽水有經派可考形勢可資灌溉遠徵伯翳摹擬道元但工塗澤蓋無取焉屈原之宅久號三閭柳下之壠特禁樵蘇迴龍舊寺宗三古廟連類紀之足供憑弔述輿地志疆域沿革表山川鄉鎮古蹟邱墓寺觀第一

禮頒月令荆記歲時省方觀民政之所宜湯湯漢水他族逼處詭異其服侏僂其語不徵禮俗何知國粹大書特書區別中外南方之狀禽魚草木北戶之錄絲麻五穀邑無特產實維商埠以佃以漁亦足致富述風土志節候禮俗物產第二

國家正供取民有制賦役成書守而弗替粵賦肆虐度支告匱抽

志

敘例

二

釐助餉以裕軍費自是以還推算日增民國改建弊政相仍攘攘漢皋輻輳商賈連衽成帷揮汗成雨丁隨地起定自清時滋生戶口皞皞熙熙天下錢漕普免十次先代所美後者誰嗣述丁賦志丁戶賦稅蠲卹第三

百官列表始自孟堅雖屬下邑豈無名賢未分治前地屬漢陽由宋以降代有循良系其邑里銓其世次前徽弗昭後美何繼政績卓著傳以彰之邵棠郇黍特留去思述職官志前代文武各職分治後文武各職改縣後文武各職表傳第四

春秋之義興作必書邑當衝要其敢忽諸城號百雉道方九軌往古來今幾成幾燬關譏出入橋利往來高擁木石隄防水災官署治事祠廟報功營繕所掌舊屬司空昔日善堂今日社會慈善十字規模益大殊方異俗翩然蒞止各置公所以聯桑梓伊誰肇造

何時落成詳書歲月標列姓名委曲繁重非無見也不厭求詳示
激勸也述建置志城池關津橋梁隄防公署祠廟坊表善堂慈善
社會義塚各會館公所第五

學校之制定自前朝采芹泮水聽講園橋我邑分治亟謀經始夷
彼梵刹建厥基址漢立博士唐置增廣興賢舉能學額所昉舊有
學田用助賓興書升論秀多士蒸蒸聖賢之教期爲世用經義治
事湖學所重旣停科舉爰創學堂教育普及遍於城鄉豈惟男兒
兼及女子爲開民智聊復爾爾述學校志學宮學額賓興前清官
立學校民國公立學校私立學校勸學所教育會第六

科目取士兩漢爲盛孝廉茂材賢良方正隋唐以後專重詞章進
士舉人名號綦詳登科有記創自樂史後世方志大率準此科舉
雖停仍襲其號畢業各生後先焜耀馬氏通考舉士舉官二者並

志

敘例

三

列可以參觀五貢以上舉士之例特科議員舉官之意清楊忠武
唐郭汾陽皆由武科彪炳旂常文武兩途並書諸策鳳起蛟騰觀
光上國述選舉志科舉畢業學生推舉自治各表第七

楚討夏氏能用忠謀鄉取一人歸號夏州談兵事者必由此始春
秋以降代不勝紀船塞沔口兵練武湖三國之際倏魏倏吳隋氏
滅陳元人襲宋假道漢口以利輸送邑濱大江無險可扼以地殷
富兵衛必設述兵事志歷代兵事第八

鐵路旣開盈廷交贊南皮張公首成京漢馬如游龍車如流水爰
開馬路陸行者喜火輪上下不假風帆爰開航路水行者安關山
間隔民氣斯頓電報設局千里一瞬置郵傳命向資馬力自設郵
政廣通消息述交通志航業鐵路馬路郵政電政第九

周禮冬官實載攷工來工之語亦見中庸我國工藝不逮西人開

廠肆習利用前民泰西舉事多集眾有命曰公司財力雄厚師其所長通力合作用謀富強庶免孱弱兩番賽會獲獎實多安見心力遽不如他述實業志工廠公司賽會得獎第十

漢鎮開埠始英吉利法俄次之美亦踵至同光兩朝來者益稠我國交際或失之柔各置領事專司裁判中外刑律何能一貫教堂醫院林立中街皆以勸善幸無嫌猜英法德俄乞開租界日本繼起由一而再煌煌約章各宜世守詳細書之以杜厥後述交涉志通商領事條約刑律教堂各國租界丈尺展界丈尺第十一

江漢雙流滙爲巨鎮有明中業漸臻繁盛況值今日中外交通輸入輸出尤宜兼綜貿易關稅悉關帑項或盈或絀稽其升降流通貨物悉賴金錢業無大小勿失利權董其事者實維商會豈徒弭中將以肆外述商務志原始及變遷輸入品輸出品貿易全額關

志

敘例

四

稅全額金融機關營業種類商團組織商會各表第十二

十步之內必有芳草先正典型安可弗表訓誥義理漢宋不分躬行實踐是謂儒林入班馬室摘屈宋艷天葩吐芬是謂文苑臨危致命不畏強暴忠義奮發白刃可蹈述人物志一儒林文苑忠義列傳殉難姓氏錄第十三

愛親敬長倫紀夙敦宗族鄉黨眾口交稱入贊綸扉出任封圻名郡劇縣政教覃施能執干戈以衛社稷虎賁策勳鷹揚奏績推恩先世蔭及後昆家有任子人號封君述人物志二孝友文武各職列傳姓氏錄封蔭錄第十四

鄉先生沒可祭於社皤皤黃耆達尊之亞一能一藝亦足以風史遷所述日者倉公九省通衢他族爭託急公好義半非土著羽客縑流儒者弗道置之簡末聊同時好述人物志三者德壽民方技

流寓方外列傳姓氏錄第十五

斷機和丸流芳千古坤厚載物有常得主如松之貞如柏之節之死靡他含冰茹蘖抱木成禮從一而終撤其環瑱遠慕北宮哀哀寡鵠悲吟淒涼夫存與存夫亡與亡深閨弱質不污泥滓守身如玉含笑而死凡此邦媛南國之華蔚爲女宗宜室宜家述列女志賢母壽母節婦孝婦貞女孝女烈女傳錄第十六十七

文章小技於道未尊當其運筆有鬼有神文以載道詩以言志片語單詞興起百世徐志嘉禾已載碑碣金石入志奉爲圭臬四庫之目朗若列眉分部辨類宜踵前規維彼作者窮年兀兀果力精心忍令湮沒述藝文志文詩著述金石第十八十九

鄭樵通志不紀徵應直書災祥所以志慎天災流行國家代有宜修人事以弭厥咎述祥異志第二十

志

敘例

五

父老流傳野史稗說可昭勸戒足資考核事求詳實言取雅馴存其大略用備異聞述雜志第二十一

呂氏寅東曰右夏口縣志十九篇總目十七子目九十有二圖二下表二十四姓氏錄四都二十二卷有報告稍遲者作補遺一卷凡四十二萬二千九百七十二言是役也襄其事者經理則李君文軒劉君少香收掌則王君廉樸圖繪則馮君叔儒鄭君蔚葑書籤則李君逮聞校對則李君晴初等四人採訪則黃君桂森等十二人書記則陳君醕甫等五人贊修則宋君竹生等二十六人監刊則周君有章等四人例得並書述序例第二十二